

**საჯარო სამართლის იურიდიული პირის - ივანე ჯავახიშვილის სახელობის  
თბილისის სახელმწიფო უნივერსიტეტის დამხმარე საგანმანათლებლო  
ერთეულის - სამრეწველო ინოვაციების ლაბორატორიისა და ბიზნეს  
ინკუბატორის დ ე ბ უ ლ ე ბ ა**

**პრეამბულა**

საჯარო სამართლის იურიდიული პირის - ივანე ჯავახიშვილის სახელობის თბილისის სახელმწიფო უნივერსიტეტის დამხმარე საგანმანათლებლო ერთეულის - სამრეწველო ინოვაციების ლაბორატორია და ბიზნეს ინკუბატორი იქმნება ქ. თბილისის მერიის (სსიპ - ტექნოლოგიური განვითარების ფონდის სახით), სსიპ - საქართველოს ინოვაციების და ტექნოლოგიების სააგენტოსა და ივანე ჯავახიშვილის სახელობის თბილისის სახელმწიფო უნივერსიტეტის ერთობლივი ინიციატივით, ივანე ჯავახიშვილის სახელობის თბილისის სახელმწიფო უნივერსიტეტისა და სსიპ - ტექნოლოგიური განვითარების ფონდის მატერიალურ-ტექნიკური და ფინანსური რესურსების გაერთიანებით.

**მუხლი 1. ზოგადი დებულებანი**

1. საჯარო სამართლის იურიდიული პირის - ივანე ჯავახიშვილის სახელობის თბილისის სახელმწიფო უნივერსიტეტის (შემდგომში – „უნივერსიტეტი“ ან „თსუ“) ინოვაციების ლაბორატორია და ბიზნეს ინკუბატორი (შემდგომში - „ლაბორატორია და ინკუბატორი“) წარმოადგენს უნივერსიტეტის დამხმარე საგანმანათლებლო ერთეულს.
2. ლაბორატორია და ინკუბატორი თავის საქმიანობაში ხელმძღვანელობს საქართველოს კანონმდებლობით, უნივერსიტეტის სამართლებრივი აქტებითა და წინამდებარე დებულებით.
3. ლაბორატორია და ინკუბატორი თავისი კომპეტენციის ფარგლებში ასრულებს უნივერსიტეტის რექტორისა და ადმინისტრაციის ხელმძღვანელის მიერ კანონმდებლობის საფუძველზე დაკისრებულ მოვალეობებს და ანგარიშვალდებულია მათ წინაშე.

**მუხლი 2. ლაბორატორიისა და ინკუბატორის მიზნები და ფუნქციები**

1. ლაბორატორიისა და ინკუბატორის მიზანია:

- ა) ქვეყანაში ინოვაციური ბიზნეს იდეებისა და პროექტების განვითარება;
- ბ) თსუ სტუდენტებისა და ფართო მომხმარებლის დაინტერესება ახალი, ინოვაციური ბიზნეს იდეების შექმნისა და რეალიზების მიზნით, მათ შორის ტექნიკური მოწყობილობებისა და სხვადასხვა ექსპერიმენტების განხორციელების მეშვეობით;
- გ) თსუ სტუდენტებისა და ფართო მომხმარებლის გათვითცნობიერება სასურველი პროდუქციის შექმნის მიზნით შესაბამისი ღონისძიებების დაგეგმვისა და განხორციელების თანამედროვე მექანიზმებში.

## 2. ლაბორატორიისა და ინკუბატორის ფუნქციებია:

- ა) თსუ სტუდენტებისა და ფართო მომხმარებლისათვის საკუთარი ინოვაციური ბიზნეს იდეების განხორციელების ხელშეწყობა;
- ბ) შესაბამისი ინოვაციური პროექტის ფარგლებში, არსებული ტექნიკური მოწყობილობების საშუალებით სხვადასხვა ექსპერიმენტების განხორციელება;
- გ) თსუ სტუდენტებისა და ფართო მომხმარებლის მიერ სასურველი პროდუქციის შექმნის მიზნით შესაბამისი ღონისძიებების დაგეგმვისა და განხორციელებაში ხელშეწყობა;
- დ) თსუ სტუდენტებისა და ფართო მომხმარებლის მიერ ლაბორატორიასა და ინკუბატორში საკუთარი იდეების განხილვის უზრუნველყოფა;
- ე) თსუ სტუდენტებისა და ფართო მომხმარებლის მიერ საკუთარი ბიზნეს მოდელების შექმნის მიზნით საკითხის ტექნიკურ, მარკეტინგული სტრატეგიისა და ფინანსური მენეჯმენტის სფეროებში ანალიზის უზრუნველყოფა;
- ვ) თსუ სტუდენტებისა და ფართო მომხმარებლისათვის ბიზნეს მოდელების შექმნისა და მათი განხილვის უზრუნველყოფა;
- ზ) თსუ სტუდენტებისა და ფართო მომხმარებლის:
  - ზ.ა) ტექნიკური კონსულტაცია და დახმარება;
  - ზ.ბ) ბიზნეს, მარკეტინგული, ფინანსური და იურიდიული კონსულტაცია;
  - ზ.გ) ბიზნეს მოდელების ჩამოყალიბება და დახვეწა;
  - ზ.დ) შეხვედრები ბიზნეს სექტორთან პროდუქტის განვითარების შემდგომ საფეხურზე გადასაცემად;
  - ზ.ე) რეგულარული „ჰაკათონები“ და შეჯიბრებები საუკეთესო პროდუქტების გამოსავლენად;
  - ზ.ვ) მაქსიმალური ტექნიკური მხარდაჭერა სასურველი პროდუქციის დასამზადებლად.

## მუხლი 3. ლაბორატორიისა და ინკუბატორის სტრუქტურა და ხელმძღვანელობა

1. ლაბორატორიასა და ინკუბატორს შიდა სტრუქტურული ერთეულები არ გააჩნია.

2. ლაბორატორიასა და ინკუბატორს ხელმძღვანელობს კოლეგია, რომლის შემადგენლობაში შედის კოლეგიის ხელმძღვანელი (ლაბორატორიისა და ინკუბატორის ხელმძღვანელი) და კოლეგიის წევრები.
3. კოლეგია შედგება 8 წევრისგან და მის შემადგენლობაში შედის უნივერსიტეტის 5 და სსიპ - ტექნოლოგიური განვითარების ფონდის 3 წარმომადგენელი.
4. კოლეგია უფლებამოსილია თუ მის სხდომას ესწრება სიითი შემადგენლობის უმრავლესობა. კოლეგია გადაწყვეტილებას იღებს ღია კენჭისყრით და გადაწყვეტილება მიღებულად ითვლება თუ მას ხმა მისცა დამსწრე წევრთა არანაკლებ ნახევარზე მეტმა. ხმების თანაბრად გაყოფის შემთხვევაში გადაწყვეტია კოლეგიის ხელმძღვანელის ხმა. კოლეგიის სხდომები აისახება ოქმებში, ხოლო მისი გადაწყვეტილება ფორმდება კოლეგიის ხელმძღვანელის ბრძანების სახით.
5. კოლეგია თავისი შემადგენლობიდან უმრავლესობით ირჩევს კოლეგიის ხელმძღვანელს, რომელსაც კოლეგიის წარდგინებით თანამდებობაზე ნიშნავს და კოლეგიის წარდგინებით ან მის გარეშე, კანონმდებლობით დადგენილი წესით თანამდებობიდან ათავისუფლებს უნივერსიტეტის რექტორი.
6. ლაბორატორიისა და ინკუბატორის სხვა თანამშრომლებს თანამდებობაზე ნიშნავს და ათავისუფლებს ადმინისტრაციის ხელმძღვანელი, ცენტრის უფროსის წარდგინებით.
7. ლაბორატორიისა და ინკუბატორისათვის განსაზღვრული თანამდებობებია – კოლეგიის ხელმძღვანელი (ლაბორატორიისა და ინკუბატორის ხელმძღვანელი), მენეჯერი, მენეჯერის თანაშემწე, დიზაინერი, ტექნიკოსი, კონსულტანტი, ტექნიკური ასისტენტი.
8. ლაბორატორიისა და ინკუბატორისათვის განსაზღვრული თანამდებობები - კოლეგიის ხელმძღვანელი (ლაბორატორიისა და ინკუბატორის ხელმძღვანელი), დიზაინერი, ტექნიკოსი, კონსულტანტი წარმოადგენს უნივერსიტეტის სამტატო განრიგით განსაზღვრულ თანამდებობებს და ფინანსდება უნივერსიტეტის ბიუჯეტიდან, ხოლო ლაბორატორიისა და ინკუბატორში არსებული დანარჩენი თანამდებობები უნივერსიტეტის მიერ არაანაზღაურებადი თანამდებობებია და შესაძლებელია ფინანსდებოდეს სსიპ - ტექნოლოგიური განვითარების ფონდის მიერ.
9. ლაბორატორიისა და ინკუბატორის იმ თანამდებობებზე, რომლებიც წარმოადგენს უნივერსიტეტის სამტატო განრიგით განსაზღვრულ თანამდებობებს კონკრეტულ პირთა დანიშვნისა თუ გათავისუფლების საკითხების გადაწყვეტისათვის იქმნება ლაბორატორიისა და ინკუბატორის საბჭო. საბჭოში წევრის სტატუსით შედიან ა(ა)იპ „თსუ ანალიზისა და პროგნოზირების ცენტრის“ სამი წარმომადგენელი, თსუ სამეცნიერო კვლევებისა და განვითარების დეპარტამენტის უფროსი, თსუ პერსონალის მართვის დეპარტამენტის უფროსი.

საბჭო უფლებამოსილია თუ მას ესწრება წევრთა ნახევარზე მეტი მაინც. საბჭო თავისი შემადგენლობიდან ირჩევს თავმჯდომარეს, ღია კენჭისყრით, დამსწრე წევრთა უმრავლესობით. საბჭო გადაწყვეტილებებს იღებს დამსწრე წევრთა უმრავლესობით, ხმათა თანაბრად განაწილების შემთხვევაში გადამწყვეტია საბჭოს თავმჯდომარის ხმა.

10. ლაბორატორიისა და ინკუბატორის კოლეგია:

ა) წარმართავს ლაბორატორიისა და ინკუბატორის მუშაობას, უზრუნველყოფს შრომის აუცილებელი პირობების შექმნას, იღებს ზომებს თანამშრომელთა პროფესიული მომზადების დონის ასამაღლებლად;

ბ) განსაზღვრავს ლაბორატორიისა და ინკუბატორის საქმიანობის პრიორიტეტებს და პასუხისმგებელია მათ განხორციელებაზე;

გ) ანაწილებს მოვალეობებს ცენტრის თანამშრომლებს შორის, აძლევს მათ მითითებებსა და დავალებებს;

დ) იხილავს ამ სტრუქტურული ერთეულის მიერ მომზადებულ დოკუმენტებს;

ე) დადგენილი წესის მიხედვით იხილავს კორესპონდენციებს და თავისი კომპეტენციის ფარგლებში იღებს გადაწყვეტილებებს;

ვ) ზედამხედველობს ლაბორატორიისა და ინკუბატორის თანამშრომლების მიერ თავიანთი სამსახურებრივი მოვალეობების ჯეროვან შესრულებას, ახორციელებს მათ მიერ უნივერსიტეტის შინაგანაწესის შესრულების კონტროლს;

ზ) კოლეგიის ხელმძღვანელის სახით წარმოადგენს ლაბორატორიასა და ინკუბატორს დაკისრებული უფლება-მოვალეობების განხორციელებისას და პასუხისმგებელია ამ სტრუქტურულ ერთეულზე დაკისრებული მიზნებისა და ფუნქციების შესრულებაზე;

თ) ორგანიზებას უწევს ამ დებულებით ლაბორატორიისა და ინკუბატორისათვის დაკისრებული ფუნქციების შესრულებას, რისთვისაც წარუდგენს უნივერსიტეტის რექტორს და უნივერსიტეტის ადმინისტრაციის ხელმძღვანელს წინადადებებს ცალკეული საკითხების მოწესრიგებისა და გადაწყვეტის მიზნით;

ი) წარუდგენს უნივერსიტეტის ადმინისტრაციის ხელმძღვანელს წინადადებებს შტატების (თავისი კომპეტენციის ფარგლებში საბჭოს რეკომენდაციით), მუშაობის ორგანიზაციის, ცენტრის თანამშრომლების წახალისების ან დისციპლინური პასუხისმგებლობის დაკისრების შესახებ;

კ) შუამდგომლობს იმ სახსრების, მოწყობილობებისა და ინვენტარის გამოყოფაზე, რაც აუცილებელია ლაბორატორიისა და ინკუბატორის წინაშე მდგარი ფუნქციებისა და ამოცანების შესასრულებლად;

ლ) თავისი კომპეტენციის ფარგლებში, კოლეგიის ხელმძღვანელის სახით წარმოადგენს ცენტრს მესამე პირებთან ურთიერთობაში;

მ) ახორციელებს საქართველოს კანონმდებლობით, უნივერსიტეტის სამართლებრივი აქტებითა და წინამდებარე დებულებით განსაზღვრულ სხვა ფუნქციებსა და მოვალეობებს.

#### **მუხლი 4. ლაბორატორიისა და ინკუბატორის ქონება**

თავის ფუნქციათა განსახორციელებლად ლაბორატორია და ინკუბატორი სარგებლობს უნივერსიტეტისა და უნივერსიტეტისათვის ამ სტრუქტურული ერთეულის ფუნქციონირების უზრუნველსაყოფად სსიპ - ტექნოლოგიური განვითარების ფონდის მიერ დროებით სარგებლობაში გადმოცემული ქონებით.

#### **მუხლი 5. ლაბორატორიისა და ინკუბატორის ფინანსები**

ლაბორატორიისა და ინკუბატორის დაფინანსების წყაროებია:

- ა) სსიპ - ტექნოლოგიური განვითარების ფონდის მიერ მიზნობრივად გამოყოფილი დაფინანსება;
- ბ) გრანტებისა და პროექტების საფუძველზე მიღებული შემოსავლები;
- გ) მომსახურების გაწევის შედეგად მიღებული შემოსავლები;
- დ) საქართველოს კანონმდებლობით დადგენილი წესით მიზნობრივად ლაბორატორიისა და ინკუბატორისათვის განკუთვნილი საჩუქრის სახით მიღებული შემოსავლები;
- ე) კანონმდებლობით აუკრძალავი ნებისმიერი შემოსავლები.

#### **მუხლი 6. ლაბორატორიისა და ინკუბატორის რეორგანიზაცია და ლიკვიდაცია**

ლაბორატორიისა და ინკუბატორის რეორგანიზაცია ან ლიკვიდაცია ხორციელდება საქართველოს კანონმდებლობით დადგენილი წესით, უნივერსიტეტის მიერ ამ სტრუქტურული ერთეულის ფუნქციონირების მიზნით გაფორმებული წერილობითი გარიგებების მოთხოვნათა დათვალისწინებით.

#### **მუხლი 7. დებულებაში ცვლილებებისა და დამატებების შეტანის წესი**

დებულებაში ცვლილებებისა და დამატებების შეტანა ხორციელდება საქართველოს კანონმდებლობით დადგენილი წესით.